

**KANTONALNA
PRIVREDNA
KOMORA TUZLA**

**BROJ 11 i 12/19,
novembar/decembar
2019. godine**



KOMORSKI INFORMATOR



**SRETNU I USPJEŠNU 2020. GODINU ŽELI VAM
KANTONALNA PRIVREDNA KOMORA TUZLA**



**PRIVREDNICI TK NA B2B
SUSRETIMA U BEOGRADU**



**PRIVREDNICI TK NA SAMITU U
TRABZONU**



**PRIVREDNICI TK U
SAARLANDU**



**ODRŽAN "INFO DAN
METALACA 2019"**



Komorski informator Uvod

Poštovani čitaoci!



Posljednji broj Komorskog informatora u 2019. godini sigurno donosi za svakog čitaoca nešto zanimljivo. Vijesti, izvještaji, informacije o urađenom, najava onoga što nas čeka, tek, simboličan presjek onoga što je urađeno u posljednj dva mjeseca 2019. godine.

Još jedne odine koja je, kako smo to nekad na ovoj stranici najavili i ocijenili, ništa ni bolja ni lošija od prethodne. Još jedna za koju ćemo reći "e neka je samo ova prošla", sa već sad znamo da ćemo slične reakcije imati na izmaku naredne.

Zato, prije nego pronađete ono što vas zanima u novinama za novembar i decembar 2019. godine, primite iskrene i tople želje za puno sreće i zdravlja u narednoj godini.

Neka vam 2020. godina donese sve najbolje na ličnom i poslovnom planu!!!

Dino Kalesić
gl. i odg. urednik



KANTONALNA
PRIVREDNA
KOMORA TUZLA



Komorski informator Sadržaj

KANTONALNA PRIVREDNA KOMORA TUZLA

**KOMORSKI INFORMATOR
BROJ 11 i 12/19,**
novembar/decembar
2019. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Izet Džananović, član
4. Suad Selimović, član
5. Edina Kurtić, član

REDAKCIJSKI KOLEGIJ:

1. Nedret Kikanović, član
2. Almir Mešić, član
3. Edina Kurtić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Hariz Altumbabić, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	Privrednici TK na samitu u Trabzonu	4
	Privrednici TK u Saarlandu	5
	Privrednici TK na B2B susretima u Beogradu	6
	Privreda TK na sajmu u Sarajevu	7
	Sastanak predstavnika komora Sarajeva, Beograda, Tuzle i Beogradskog sajma građevine „SEEBBE“	8
	Aktivnosti komorskih tijela i udruženja	9
	“Digitalne tehnologije u malim i srednjim preduzećima (MSP) u BiH”	9
	Rasprava o Nacrtu zakona o ugostiteljstvu FBiH	10
	Održan „Info dan metalaca 2019”	11
	„BH ENGINEERING WEEKS“ u Tuzli	12
	Društveno odgovorni projekti obilježili 2019. godinu	13
	Sajam “List” - prilika za promociju i poslovno povezivanje	14 i 15
	Uskoro nova dionica magistralne ceste Šićki Brod – Đurđevik	16
	Memorandum Privredne komore FBiH, turskog IZFAS-a i sajma „Energia“	17
	Hotel “Soni lux” Tuzla	18
	Najava sajmskih manifestacija	22 i 23



4. poslovni samit „Put svile“...

Privrednici TK na samitu u Trabzonu

18 privrednika iz 12 firmi iz Bosne i Hercegovine među 500 učesnika iz 23 zemlje



Na četvrtom tradicionalnom godišnjem poslovnom samitu „Put svile“, koji je organizovala Republika Turska, učestvovalo je više od 500 učesnika iz 23 zemlje, a među njima u 18 privrednika iz 12 firmi iz Bosne i Hercegovine. Delegacija iz naše zemlje je boravila na ovom značajnom skupu posredstvom Fondacije BIGMEV a u saradnji sa Privrednom/Gospodarskom komorom Federacije BiH i Kantonalne privredne komore Tuzla. Na samitu „Put svile“, koji je održan od 27. do 29. novembra, održano je niz poslovnih konferencija i panela, kao i susreta poslovnih ljudi i privrednika u kojima su puno učešće uzli članovi delegacije BiH. Na čelu delegacije iz naše zemlje bio je Zlatan Vujanović predsjednik Savjeta za strane investitore FBiH i ministar za trgovinu FBiH, koji je istakao da je tokom razgovora sa čelnicima milionskog grada Trabzona, koji je bio domaćin ovogodišnjeg „Put svile“ izražena volja za uspostavu odnosa zbratimljenosti s nekim od gradova u BiH.



„Riječ je o gradu koji je industrijski i poslovni centar sjeverozapadne Turske, jednom privrednom gigantu. Njihova otvorena ruka za kreativne lidere naših općina i gradova je velika prilika“, rekao je Vujanović. „Ministar Vujanović je na panelu „Kultura i turizam - poveznica za ekonomski razvoj među zemljama Puta svile“, predstavio potencijale BiH i FBiH za poslovna ulaganja i strane investicije, s naglaskom na turizam, te istakao značaj kulturno-historijske tradicije i povezanosti BiH i Turske“, saopćeno je iz Ministarstva trgovine FBiH. Vujanović je istakao i da naša zemlja ima dobre odnose s

Kinom i Rusijom, te je naglasio uvijek aktuelnu ambiciju za privlačenje turista, čiji je trend posjete rastući, ali još uvijek mali u odnosu na potencijale, ali i investitora iz Kine i Rusije. Privrednike sa područje Tuzlanskog kantona predvodio je Nedret Kikanović predsjednik Kantonalne privredne komore Tuzla. **„Ovo je jedno veliko iskustvo. Veoma nam je značajno da smo uspjeli organizovati naše privrednike, omogućiti im priliku da prisustvuju jednom ovako značajnom skupu kao što je samit „Put svile“. Raduje nas činjenica da je ovaj skup iskorišten za niz kontakata, razmjena iskustava, razgovora o mogućoj saradnji u narednom periodu“**, izjavio je predsjednik Nedret Kikanović. Istakao je da će i u narednom periodu Kantonalna privredna komora Tuzla poduzimati aktivnosti na organizovanju posjeta značajnim evropskim skupovima, samitima te da će se u narednom periodu pokušati ostvariti što više poslovnih susreta naših privrednika i privrednika iz razvijenih evropskih zemalja.



Četvrti tradicionalni godišnji poslovni samit „Put svile“, omogućio je učesnicima razmjenu iskustava i nove pristupe u sektorima mašina, građevinskih materijala, prehrambene industrije, namještaja, tekstila, plastike, transporta, turizma i kulture. Glavni pokrovitelj ovogodišnjeg samita je bio ministar financija i trezora Republike Turske Berat Albayrak.

D.K.



Poslovni susreti u Njemačkoj...

Privrednici TK u Saarlandu

U njemačkom Saarbrückenu održan je sastanak privrednika sa područja Tuzlanskog kantona i privrednika regije Saarland



Kantonalna privredna komora Tuzla bila je suorganizator poslovnih susreta privrednika sa područja Tuzlanskog kantona i Industrijske i trgovinske komore Saarland (IHK Saarland). Glavna tema sastanka u Sarbriken (Saarbrücken), glavnom gradu njemačke savezne pokrajine Saarland bila je mogućnost saradnje i povezivanje privreda Tuzlanskog kantona i ove njemačke pokrajine. Domaćine su na sastanku u Privrednoj komori Saarlanda predstavljali i o privrednim potencijalima SR Njemačke i Saarlanda te mogućnostima saradnje sa BiH govorili David Parkmann predstavnik Privredne komore SR Njemačke u BiH, Oliver Groll i Daniel Gessner (IHK Saarland), Thomas Schuck (SHS Strukturholding Saar GmbH – Aerodrom Sarbriken), (Michael Hartz (SHS Foundation), Vedrana Sokolić (Saaris), Ulrich Höfer i uspješni biznismeni iz BiH u Saarlandu, Azim Adi Čaušević koordinatorka Fondacije SHS Tuzla, Mirsad Puzić (Die Kartoffel), Haris Pečenković (Trucktec), Esad Puzić, Ahmed Osmanović i predsjednik Udruženja građana BiH sa područja Općine Živinice „Most Živinice“ Haris Halilović. Delegaciju Tuzlanskog kantona predvodili su Edina Kurtić Rukovodilica sektora udruženja Kantonalne privredne komore Tuzla, Kasim Selimović vlasnik firme „Piemonte“ doo Tuzla i predsjednik Odbora Udruženja za trgovinu, ugostiteljstvo i turizam Kantonalne privredne komore tuzla te Ramiz Karić savjetnik u firmi „Herceg“ doo Srebrenik i član Upravnog Odbora Kantonalne privredne komore Tuzla.



Nakon odlične video prezentacije privrednih potencijala Tuzlanskog kantona koji je predstavila Edina Kurtić, prisutni su sa velikom pažnjom pogledali i film o privredi Tuzlanskog kantona. Privrednici, Selimović i Karić su, nakon predstavljanja svojih kompanija iznijeli konkretne prijedloge moguće saradnje i ulaganja u privredu Tuzlanskog kantona. Konkretni su bili i predstavnici njemačke kompanije Trucktec koji su iskazali potrebu sa saradnjom u oblasti auto-industrije. Nakon obraćanja i prezentacija uslijedili su bilateralni razgovori predstavnika bh i njemačkih kompanija. Većina učesnika u tim razgovorima, posebno u razgovorima sa Thomasom Schuckom direktorom aerodroma u Sarbriken, isticala je potrebu uspostavljanja direktne avio linije Tuzla-Saarbrücken koja bi znatno poboljšala mogućnosti privredne saradnje, posebno u oblasti turizma.



Domaćin susreta privrednika Tuzlanskog kantona i Saarlanda bila je IHK Saarland (Industrijska i trgovinska komora Saarland) i Fondacija SHS. Inicijatori uspostavljanja saradnje između Saarlanda i Tuzlanskog kantona su uspješni Bosanci u Saarlandu, članovi SHS – Foundation Saarland – Tuzla, među kojima treba posebno istaći Azima Adija Čauševića, Mirsada Puzića i Esada Puzića.

D.K.



Regionalna međukomorska saradnja...

Privrednici TK na B2B susretima u Beogradu

Susrete organizovale Privredna komora Beograda i Kantonalna privredna komora Tuzla



Kantonalna privredna komora Tuzla organizovala je privrednu delegaciju, predstavnike firmi članica Komore, za poslovne susrete koji su održani u organizaciji Privredne komore Srbije - Privredna komora Beograd. Privrednu delegaciju iz Tuzlanskog kantona predstavljalo je oko 20 privrednika, predstavnika kompanija iz oblasti građevine, prehrambene, grafičke i metalne industrije, turizma, IT sektora. "Ovo je izuzetno značajna aktivnost koju poduzima Kantonalna privredna komora Tuzla. Veoma je važno otvoriti se regionu, razmijeniti iskustva učiniti prve korake ka uspostavi saradnje koja, sasvim je to sigurno i već dokazano, može biti na obostrano zadovoljstvo", izjavio je Sadik Džidić direktor BH Telecoma dd Sarajevo Direkcija Tuzla, inače, član Upravnog Odbora Kantonalne privredne komore Tuzla.

"Izuzetno smo zadovoljni činjenicom da Kantonalna privredna komora Tuzla nastavlja sa aktivnostima koje upravo trebaju privredni Tuzlanskog kantona a to je stvaranje mogućnosti za nove poslovne iskorake. Mi smo stalni sudionici ovakvih komorskih aktivnosti i vrlo rado smo se odazvali pozivu da budemo dio delegacije na poslovnim susretima u Beogradu. Smatramo a i imamo pozitivna iskustva, da regije Beograd i Tuzlanski kanton imaju šta ponuditi jedni drugima i sasvim je sigurno da će i nakon ovih susreta privrednici imati dobre temelje za unaprijeđenje poslovanja", rekao je u Beogradu Asim Begović direktor firme „Tehna“ Gračanica.



Hariz Altumbabić direktor firme „Grin“ Gračanica bio je dio privredne delegacije koja je prisustvovala susretima u Beogradu: **"Bilo je veliko zadovoljstvo biti dio ove**

izuzetno uspješno priče, dobro organizovanih susreta koji su rezultirali dobrim kontaktima. Mislim da smo na dostojanstven način predstavili našu privredu i stvorili dobre pretpostavke za povezivanje sa partnerima iz cijele beogradske regije i nadam se da nećemo stati na ovom skupu. Privredni TK je potrebno što više ovakvih kontakata, sastanaka, poslovnih susreta", rekao je Altumbabić.

"Nadam se da će poslije ovih susreta sa privrednicima iz Srbije naša saradnja biti još intenzivnija i da ćemo uspjeti da dogovorimo konkretne poslovne aranžmane i započnemo zajedničke projekte", rekao je Dino Kalesić Rukovodilac sektora za edukaciju, promociju, regionalnu saradnju i odnose s javnostima i sekretar Udruženja za trgovinu, ugostiteljstvo i turizam Kantonalne privredne komore Tuzla. U delegaciji iz Tuzlanskog kantona bio je i Almir Mešić rukovodilac sektora finansija i opštih poslova i sekretar Udruženja za građevinarstvo i IGM Kantonalne privredne komore Tuzla.



"Cilj susreta je bio uspostavljanje poslovne saradnje, povezivanje, promovisanje poslova i tehnologija, privrednih potencijala i investicionih mogućnosti, pronalaženje partnera za zajedničke nastupe na tržišta u regionu i prema velikim kompanijama, razmena iskustava", stava su članovi delegacije Privredne komore Beograda, Jovan Krstović koordinator za industriju, Ljiljana Brajović koordinator za usluge i Miodrag Veseli koordinator za poljoprivredu i glavni organizator poslovnih susreta privredna Beograda i Tuzlanskog kantona. Za očekivati je da će već početkom naredne godine uslijediti uzvratna posjeta, dolazak delegacije privrednika i Privredne komore Beograd u Tuzlu, Tuzlanski kanton i Kantonalnu privrednu komoru Tuzla. Delegaciju privrednika sa područja Tuzlanskog kantona činili su predstavnici firmi članica Komore: „Tehna“ doo Gračanica, „Fana“ doo Srebrenik, „Grin“ Gračanica, TA „Golden tours“ Tuzla, BH Telecom Direkcija Tuzla, Turistička zajednica Tuzlanskog kantona, „Imel“ Lukavac, „Tehnograd Comapny“ Tuzla, Hotel „Tehnograd“ Tuzla, „Tuzla kvarc“.

Pripremio: Dino Kalesić



Na Sajmu privrede u Sarajevu 236 učesnika...

Privreda TK na sajmu u Sarajevu

Moto sajma "Domaći proizvod u službi građana Bosne i Hercegovine"



Centar "Skenderija" je i ove godine bio domaćin 6. sajma privrede, poljoprivrede i zanatstva i 43. sajam roba široke potrošnje. U Sarajevu se predstavilo 236 izlagača na sajmu koji je održan pod motom "Domaći proizvod u službi građana Bosne i Hercegovine". Bila je ovo još jedna prilika da se na jednom mjestu predstavi više segmenata privredne djelatnosti, te da posjetioci vide šta je to što nudi privreda BiH. Na svečanosti otvaranja sajma, Amer Kapo direktor KJP Centra "Skenderija" je rekao da su ove sajamske manifestacije dio programa obilježavanja 50 godina od osnivanja "Skenderije" te prilika za druženje, razgovore, razmjenu iskustava i sklapanje poslova. **"Nakon ovog Sajma privrede, očekuje nas i izložba automobila, a slijede i drugi projekti. Na platou smo pripremili i zimsku čaroliju koja podsjeća na novogodišnji vašar iz kojeg je nastao Sajam roba široke potrošnje kada su građani u "Skenderiji" kupovali robu za sebe i svoje prijatelje. Želimo na neki način da podsjetimo da je "Skenderija" centralno mjesto kada je riječ o BiH i održavanju sajmovi",** dodao je Kapo. Počasni gost sajma ove godine je turski grad Konja a pokrovitelj Ministarstvo privrede KS.



Jedna od učesnica na sajmu je Enisa Bratanović, direktorica Udruženja "HO Lotosice" Tuzla, koja je kazala da prvi put učestvuju na ovoj manifestaciji. **"Kantonalna privredna komora Tuzla nas je pozvala da budemo izlagači na njihovom štandu, a prethodno smo također učestvovali na Diplomatskom zimskom bazaru gdje smo bili gosti OSCE-a",** kazala je Bratanović dodajući da proizvode, koje su izložili, uglavnom rade žene sa invaliditetom. Njihova organizacija "Lotosice", kako je dodala, podržava i pokušava da radi na razvoju socijalnog poduzetništva i ekonomskom osnaživanju žena sa invaliditetom. **"Očekujem da ćemo ostaviti dobar utisak i sa našim proizvodima doprinijeti promjeni svijesti naših sugrađana o pravima i mogućnostima osoba sa invaliditetom, kao osobama koje itekako mogu biti korisne svojim porodicama i društvenoj zajednici. Naravno, očekujem da ćemo i nešto od naših proizvoda prodati što će značiti podršku radu naše organizacije i osoba sa invaliditetom koji rade ove proizvode",** dodala je Bratanović.



Pored "Lotosica" na zajedničkom izložbenom prostoru koji Komora organizuje pod nazivom "Privreda TK", predstavljani su proizvodi i usluge firmi članica Komore: „Borplastika Eko“ Tuzla, Hotel "Mellain" - Lječilište Slana Banja Tuzla, Turistička organizacija Grada Tuzla, "Eko život" Tuzla, Predstavništvo strane HO "CISP" - Comitato internazionale per lo sviluppo dei popoli Tuzla, BH IVF Centar "Dr Balić" Tuzla, "Imel" doo Lukavac PJ "Milo selo", Fabrika deterdenata "Dita" Tuzla, "Fana" Srebrenik, Mlin "Nezić" Gradačac, Pčelarstvo Fazlić Tuzla, "Corn Flips" Srebrenik.

D.K.



Iz Udruženja za građevinarstvo i IGM...

Sastanak predstavnika komora Sarajeva, Beograda, Tuzle i Beogradskog sajma građevine „SEEBBE“

Okrugli sto na sajmu SEEBBE u Beogradu u cilju rješavanja problematike poslovanja građivinskih firmi



Kantonalna privredna komora Tuzla poduzela je nekoliko značajnih aktivnosti na povezivanju privrednika sa područja Tuzlanskog kantona i regije Beograd. Nedavno su upriličeni Poslovni susreti u Privrednoj komori Beograda na kojima se okupio zavidan broj privrednika iz pomenutih regija. Ostvarili su kontakte, razmijenili iskustva, dogovorili prve zajedničke aktivnosti. Od velikog značaja je nastup i predstavljanje privrednika Tuzlanskog kantona na nekoliko sajamskih manifestacija koje potpisuje Beogradski sajam. Zajednička postavka pod nazivom "Privreda TK", zahvaljujući izvanrednoj saradnji sa predstavnicima Beogradskog sajma, njihovoj susretljivosti, profesionalizmu spremnosti na saradnju i

ustupanju sajamskog prostora, prisutna je sada već redovno i na Sajmu građevine "SEEBBE" koji je jedna od najznačajnijih sajamskih manifestacija iz oblasti građevinarstva u široj regiji. Iz takvih odnosa rodila se i ideja da se i građevinske firme iz Kantona Sarajevo povežu u ovu pozitivnu privrednu priču. Kao rezultat tih nastojanja, uslijedio je sastanak u Privrednoj komori Sarajevo koju su predstavljali Lejla Halkić direktorica Centra za edukaciju i informatičke poslove, Elvira Begović stručni saradnik u ovome Centru i Kemal Hadžimustafić stručni saradnik u Centru za razvoj poduzetništva i poslove sa inozemstvom. Delegaciju iz Beograda predstavljali su Dejana Cahun koordinator projekta Ana Želčeski administrator projekta Beogradskog sajma građevine a Jovana Čurčić je govorila u ime građevinaca koji su okupljeni u Sektor građevine pri Privrednoj komori Beograda. Kantonalnu privrednu komoru Tuzla predstavljali su Almir Mešić sekretar Udruženja za građevinarstvo i IGM i Dino Kalesić sekretar Udruženja za trgovinu, ugostiteljstvo i turizam. Predstavnici građevinskih firmi iz Sarajeva su na ovom sastanku upoznati sa svim pogodnostima koje donosi predstavljanje na Beogradskom sajmu građevine. Iznijeli su i brojna iskustva dosadašnjih poslovanja sa firmama u Srbiji, zajedničkih nastupa na trećim tržištima, problemima sa kojima se susreću. Na sastanku je pokrenuto i nekoliko značajnih inicijativa koje bi u narednom periodu mogle donijeti olakšice u poslovanju naših privrednika. Najveći problem našim privrednicima predstavljaju administrativna opterećenja, opširna dokumentacija, ne postojanje obrasca koji bi im na jednom mjestu dao tačne informacije o svim potrebnim dokumentima za rad u Srbiji, zajedničkim poslovima sa srbijanskim firmama u Crnoj Gori, angažovanju vlastitih sredstava i radne snage za te poslove, njihov prelazak granice i boravak u navedenim zemljama u toku sezonskih radova. Brojna opterećenja za čije rješavanje je neophodno uključivanje svih relevantnih institucija, resornih ministarstava, privrednih komora a konkretan prijedlog došao je i iz Beogradskog sajma.

"Spremni smo učiniti maksimalne napore da se u okviru Beogradskog sajma građevine u aprilu 2020. godine, organizuje Okrugli sto ne kojem bi razgovarali o svim ovim problemima. Potrebno je da svako sa svoje strane animira predstavnike resornih ministarstava, organizuje privrednike i da na jednom mjestu analiziramo iskustva, pokušamo pronaći rješenja za probleme sa kojima se susreću privrednici. Ujedno, mi ćemo se potruditi da dolazak i boravak privrednika iz Sarajeva i Tuzle na Beogradskom sajmu građevine bude iskorišten i za konkretne, direktne susrete i razgovore sa potencijalnim investitorima, poslovnim partnerima, sa osobama koje mogu dogovoriti nove poslove. Isti ovakav sastanak smo imali i u Privrednoj komori RS u Banjaluci i njihovi privrednici zajedno sa predstavnicima Komore su iskazali spremnost da se naredne godine učestvuju na Sajmu, da se uključe u sve aktivnosti koje mogu doprinijeti kvalitetnijem poslovanju a sasvim je sigurno da je Beogradski sajam građevine SEEBBE, idealno mjesto i vrijeme za takve razgovore i kontakte", izjavila je u Sarajevu Dejana Cahun koordinator projekta Beogradski sajam građevine SEEBBE. Pokrenuta je inicijativa da se u najkraćem roku organizuje sastanak u Sarajevu na kojem će predstavnici kantonálnih komora Sarajeva i Tuzle organizovati privrednike, predstavnike građevinske industrije, animirati sve relevantne institucije, nivoe vlasti, kako bi se pokušalo doći do konkretnih prijedloga za rješenje problema. Za očekivati je da će i privrednici sa područja koje pokriva Privredna komora Sarajevo, učestvovati na narednom sajmu građevine SEEBBE u Beogradu, biti redovni učesnici, pojedinačno ili organizovano, kao što to u postavci "Privreda TK" sada već tradicionalno radi Kantonalna privredna komora Tuzla.



D.K.



Aktivnosti komorskih tijela i udruženja...

Održane sjednice UO i Skupštine Komore

Usvojeni nacrti programa rada i finansijskog plana za 2020. godinu



Na izmaku kalendarske 2019. godine, održane su redovne sjednice komorskih tijela. Sastanke su održali članovi Upravnog Odbora i Skupštine Kantonalne privredne komore Tuzla. Razmotreni su i usvojeni Nacrt programa rada Kantonalne privredne komore Tuzla za 2020. godinu te Nacrt finansijskog plana Kantonalne privredne komore Tuzla za 2020. godinu. Članovima ovih komorskih tijela je prezentovana ideja organizovanja „Sajma privrede Tuzla 2020“ koja je dobila podršku. Na kraju godine, u Komori je upriličeno i tradicionalno druženje privrednika i predstavnika Vlade Tuzlanskog kantona.

Prezentacija u Komori...

“Digitalne tehnologije u malim i srednjim preduzećima (MSP) u BiH”

Sve veća uloga digitalne transformacije u privredi, kako na globalnom tako i na lokalnom nivou a u cilju podizanja efikasnosti poslovanja preduzeća



Kantonalna privredna komora Tuzla u saradnji sa Ministarstvom privrede Tuzlanskog kantona, Udruženjem za razvoj NERDA i Deutsche Gesellschaft für Internationale Zusammenarbeit (GIZ) GmbH upriličila je prezentaciju "Digitalne tehnologije u malim i srednjim preduzećima (MSP) u BiH". Prezentacija je organizovana u cilju otpočinjanja procesa uspostave platforme za digitalnu transformaciju za mala i srednja preduzeća u Tuzlanskom kantonu po uzoru na sličan model, tj. Centar za digitalnu transformaciju (<https://cdt.org.rs/>), koji je uspostavljen u Srbiji tokom 2018. godine od strane Privredne komore Srbije, takođe uz podršku GIZ-a. Pored prezentacije procesa uspostave Centra koju je izvršio Jürgen Kapenmann konsultant GIZ-a, i iskustava iz prakse provođenja projekata digitalne transformacije u malim i srednjim preduzećima, prezentovane su i trenutne potrebe malih i srednjih preduzeća za podrškom u procesu digitalne transformacije dobijene istraživanjem.

"Zadovoljstvo je da smo organizovali jednu ovakvu prezentaciju i ugostili, pored privrednika i predstavnika GIZ-a, Nerde, Ministarstva privrede, i Jürgena Kapenmanna koji je konsultant GIZ-a. Prezentirani su prvi rezultati istraživanja o potrebama preduzeća vezano za digitalnu transformaciju te identificirana područja za koja su privrednici iskazali najveći interes. Konsultant Kapenmann je prisutnim privrednicima pojasnio šta sve obuhvata proces digitalne transformacije, koje su njene mogućnosti za unaprjeđenje poslovanja svakog preduzeća, bez obzira na djelatnost kojom se bave, kao i nužnost provođenja ovog procesa koji je već sveprisutan u globalnom poslovanju da bi se sačuvala korak sa savremenim poslovnim tokovima. Naši gosti na prezentaciji su dobili i informacije o Centru za digitalnu transformaciju koji je uspostavljen u sklopu Privredne komore Srbije a čiji je zadatak da pruži ekspertsku podršku preduzećima u Srbiji na njihovom putu u Industriju 4.0. S obzirom da je jedan od ciljeva projekta „Digitalizacija i inovacije u MSP u BiH“ koji implementira GIZ, uspostava Centra za digitalnu transformaciju u Tuzlanskom kantonu, u narednom periodu će se kroz pilot aktivnosti odabrati 10 firmi koje bi po metodologiji Centra za digitalnu transformaciju i ekspertsku pomoć, krenuti u identifikaciju mogućnosti za unaprjeđenje poslovanja i izradu strategija i identifikiranje aktivnosti koje je nužno poduzeli u tim firmama. Primarni cilj projekta „Inovacije i digitalizacija u malim i srednjim preduzećima u BiH“ je da obezbijedi podršku malim i srednjim preduzećima u BiH da unaprijede svoje inovacione kapacitete putem korištenja digitalnih tehnologija i unaprijediti raspoloživost odgovarajuće podrške za preduzeća u ovoj oblasti, te ojačati saradnju MSP sa donosiocima relevantnih politika, predstavnicima javnog sektora i naučno-istraživačkih institucija", izjavila je Edina Kurtić rukovodilac Sektora udruženja Kantonalne privredne komore Tuzla. Imajući u vidu sve veću ulogu digitalne transformacije u privredi, kako na globalnom tako i na lokalnom nivou, a u cilju podizanja efikasnosti poslovanja preduzeća, raduje dobar odziv na prezentaciju privrednika koji su prepoznali značaj ovog događaja.

D.K.



Javna rasprava u Komori...

Rasprava o Nacrtu zakona o ugostiteljstvu FBiH

Završne aktivnosti na izradi novog Zakona o ugostiteljstvu FBiH



Nakon što su oba doma Parlamenta Federacije BiH odobrila nacrt novog Zakona o ugostiteljstvu FBiH koji im je dostavila Vlada FBiH, Federalno ministarstvo okoliša i turizma kao obrađivač provelo je završne aktivnosti na pripremi prijedloga tog dokumenta. Radna grupa Ministarstva započela je javne rasprave u svih 10 kantona FBiH s ciljem izrade što kvalitetnijeg teksta Prijedloga zakona o ugostiteljstvu FBiH i kako bi se u pripremu i izradu uključile sve nadležne institucije, pravni subjekti i fizičke osobe zainteresirane za oblast ugostiteljstva. Iz resornog federalnog ministarstva također pozvali su sve zainteresirane da osim kroz javne rasprave svoje prijedloge i sugestije na predloženi dokument dostave i izravno ministarstvu, a koje će biti razmotrene i ukoliko

budu imale argumentirane osnove biti uvažene – ugrađene ili brisane iz predloženog dokumenta. Predviđenim rješenjima novog zakona pojednostavljeni su postupci za registraciju i rad ugostiteljskih objekata u Federaciji BiH, znatno je ubrzano provođenje procedura i postupaka obuhvaćenih zakonom, odnosno potrebno vrijeme je reducirano za 50 posto. Komplementarno, ovom zakonu pripremljeni su i zakoni o turizmu i boravišnoj taksi, koji uz ove izmjene i novitete donose povećan priliv u budžet, odnosno novim rješenjima se omogućava potencijalni prosječni priliv prihoda u iznosu od 830.000 KM na godišnjem nivou. Zakonom se uređuju uslovi za razvoj i obavljanje ugostiteljstva kao privredne grane, obaveze ugostitelja, osnivanje i prestanak ugostiteljske radnje i ostale vrste ugostiteljske djelatnosti, vrste i kategorizacija ugostiteljskih objekata, ugostiteljske usluge u domaćinstvu i seoskom domaćinstvu, registri u ugostiteljstvu i druga pitanja iz oblasti ugostiteljstva. Zakon predviđa osnivanje registra ugostiteljstva u Federaciji BiH kojim će biti obuhvaćeni svi subjekti koji se bave tom djelatnošću, a u sistem se uvode iz fizičke osobe iznajmljivači koji pružaju ugostiteljske usluge u vlastitom domaćinstvu i to usluge smještaja u sobi, apartmanu i kući za odmor ili usluge smještaja u kampu koje su dobile rješenje o odobrenju za pružanje ugostiteljskih usluga u domaćinstvu. Kako su naveli, predlagači su pri izradi prednacrt detaljno analizirali i EU propise iz te oblasti kako bi se moguća rješenja ugradila u domaće zakonodavstvo iz oblasti ugostiteljstva. Novim zakonom se definira da je ugostiteljska djelatnost sporedna ili dodatna djelatnost, a ne više osnovna. U praksi sada, prema postojećem zakonu, vlasnik može imati samo jedan restoran, kafić ili hotel i mora biti zaposlen u tom restoranu. Novim zakonom se omogućava da vlasnik jednog restorana može imati svoj lanac restorana ili da neko ko je zaposlen u javnoj upravi ili privatnoj kompaniji, može svoj kapital investirati u restoran te na taj način omogućiti nova radna mjesta, državi više novca kroz plaćanje poreza, a sebi veću zaradu. Zakonom je propisano i da u prostoru gdje se obavlja ugostiteljska djelatnost, mora biti osiguran nesmetan pristup i kretanje za osobe s umanjnim tjelesnim sposobnostima. U ugostiteljskim objektima je zabranjeno prodavati i posluživati alkoholna pića osobama mlađim od 18 godina, a u objektu u kojem se poslužuju alkoholna pića, mora na vidnom mjestu biti istaknuta oznaka o zabrani posluživanja, odnosno konzumiranja alkoholnih pića osobama mlađim od 18 godina. Novčane kazne za prekršioce tog zakona su od 100 i do 30.000 KM. Prednacrt Zakona o ugostiteljstvu Federacije BiH s predloženim zakonskim rješenjima, kako ističu predlagači u obrazloženju, ima za cilj i da doprinese suzbijanju sive ekonomije i osigura bolju zaštitu korisnika usluga i ugostiteljstvu, jer se predloženim rješenjima nastoji uvesti više discipline u tu oblast. Na raspravi u Kantonalnoj privrednoj komori Tuzla učestvovali su predstavnici svih relevantnih institucija, pravni subjekti i fizičke osobe zainteresirane za oblast ugostiteljstva iz ovog kantona. Uputili si svoje primjedbe i sugestije na navedeni dokument. **“Nadležnosti nisu dovoljno jasno izdefinisane, ponovo nam se javlja problem iznajmljivača – fizičkih lica, gdje nije tačno definisano šta to podrazumijeva. Već u drugom članu imamo da se kaže da iznajmljivač – fizičko lice treba da pribavi rješenje o odobrenju za obavljanje ugostiteljske djelatnosti, znači odobrenje za rad. U zakonu iz 2009. imali smo tumačenje da je dovoljno samo da pribavi rješenje o ispunjavanju minimalnih tehničkih uvjeta, znači ne odobrenje za rad. On se samo prijavljuje Poreskoj upravi gdje plaća određeni paušal na broj kreveta”**, istakla je Dželmina Huremović, pomoćnik za trgovinu i turizam u Ministarstvu za trgovinu, turizam i saobraćaj TK. Hasan Sejdinović, stručni saradnik za turizam u Ministarstvu za trgovinu, turizam i saobraćaj TK, dodaje da su stavovi tog ministarstva, ali i većine lokalnih zajednica s područja TK je da se ovaj Nacrt povuče iz parlamentarne procedure i da Federalno ministarstvo formira radno tijelo koje će sačinjavati ljudi iz kantonalnih resornih ministarstava, lokalnih zajednica, inspeksijskih službi: **“Mislimo da imamo kvalitetan kadar da napravimo zakon koji će riješiti problem ugostiteljske djelatnosti u FBiH”**, kazao je Sejdinović. Nakon obavljenih javnih rasprava, Vlada Federacije BiH će utvrditi konačan prijedlog Zakona o ugostiteljstvu BiH koji će bit upućen Parlamentu FBiH u proceduru usvajanja.

D.K.



Promocija metalske industrije...

Održan “Info dan metalaca 2019”

Privredna/Gospodarska komora F BiH je u saradnji sa Kantonalnom privrednom komorom Tuzla i uz partnerski događaj „BH Engineering Week 2019”, organizovala ovaj događaj kao još jedan vid promocije ove privredne grane



U Tuzli je u Bosanskom kulturnom centru održan „Info dan metalaca 2019”, uz prisustvo velikog broja predstavnika kompanija metalske i elektro industrije, institucija i komorskog sistema. Imajući u vidu da metalnoj industriji u Bosni i Hercegovini dugi niz godina pripada status najznačajnije grane industrije, a posljednjih godina bilježi evidentan rast proizvodnje i izvoza, Privredna/Gospodarska komora F BiH je u saradnji sa Kantonalnom privrednom komorom Tuzla i uz partnerski događaj „BH Engineering Week 2019”, organizovala ovaj događaj kao još jedan vid promocije ove privredne grane. Privredna / Gospodarska komora Federacije Bosne i Hercegovine po četvrti put kroz Info dan metalaca prezentuje pozitivne i uspješne priče, a sve u cilju dalje afirmacije i razvoja metalnog sektora u BiH. Na ovogodišnjem Info danu metalaca govorili su federalni ministar trgovine Zlatan Vujanović, predsjednik P/G K FBiH Mirsad Jašarspahić, predsjednik KPKT Nedret Kikanović i predsjednik Udruženja metalne i elektro industrije Kasim Kotorić. Direktor Sektora za industriju i usluge i sekretar Udruženja metalne i elektro industrije Almin Mališević prezentirao je stanje, uspješne projekte i mogućnosti metalne industrije BiH.



Centralna tema “Info dana metalaca 2019” bila je izgradnja Bloka 7 TE Tuzla, kao šanse za metalnu industriju BiH. Imajući u vidu da su u toku pripremni radovi na izgradnji ovog najvećeg poslijeratnog projekta u BiH ukupne vrijednosti 722 miliona eura, na događaju je naglašen značaj projekta za razvoj domaćih kompanija, prvenstveno iz metalske industrije, a zatim i svih pratećih industrija. Predstavnik JP

Elektroprivreda BiH Ramo Ibrišević prezentirao je projekt izgradnje Bloka 7 TE Tuzla sa akcentom na metalnu industriju. „Kako se radi o projektu koji može biti motor razvoja metalske, elektro, građevinske i drugih industrija, neophodno je raditi na pripremi kompanija kako bi bile u kapacitetu kadrovski i tehnološki kvalitetno odgovoriti zahtjevima projekta”, kazao je predsjednik P/G K FBiH. O tehnologiji budućnosti – vještačkoj inteligenciji, govorio je Namik Hrle, bosanac koji nosi titulu IBM Fellow. Radi se o čovjeku koji je IBM-ov glavni izumitelj, član IBM Akademije i Vijeća tehničkih stručnjaka. Predstavnik kompanije Banstroj d.o.o. Banovići, Tarik Saletović, uradio je prezentaciju projektovanja i karakteristika Pelton turbine. Radi se o kompaniji sa bogatim iskustvom i velikom listom realiziranih projekata u BiH i zemljama regiona. Adnan Ahmetbegović iz kompanije Fining d.o.o. Gračanica, prezentirao je karakteristike dvoredne portalne dizalice. Fining je kompanija koja dugi niz godina radi veoma kvalitetne uređaje za dizanje tereta.



O industriji 4.0, robotici sa primjerima aplikacije za robotsko brušenje govorio je Franc Žaberl iz kompanije Fanuc. Bužinom da je 15. novembar Dan metalaca, govornici i svi prisutni su iskoristili održavanje Info dana metalaca da ukažu na pozitivne trendove u ovoj industriji i upute čestitku metalcima Bosne i Hercegovine.

D.K.



„BH ENGINEERING WEEKS“ u Tuzli... „Povežimo budućnost“

Manifestacija upriličena u Tuzli, Sarajevu, Banjaluci i Bihaću



Sredinom novembra u Tuzli je pod sloganom „Povežimo budućnost“ održana BH Sedmica inženjerstva. Događaj kojim su povezani izuzetni događaji koji će doprinijeti snažnijoj i kvalitetnijoj zajednici inženjera i stručnjaka u BiH i boljoj povezanosti sa industrijom regije i Evrope, ali i napravljen i novi prepoznatljivi brand pod imenom BH ENGINEERING WEEKS. Ova manifestacija upriličena je i drugim gradovima Bosne i Hercegovine, Sarajevu, Banjaluci, Bihaću a prvi veliki događaj održan je u Tuzli, sa temama: Made in BiH, Energetika (Termoelektrana Tuzla blok 7; Termoelektrana Banovići), Smart City/ Pametni grad- (Trento; Živinice- prekogranična saradnja Crna Gora,

Hrvatska), Robotika, industrija 4.0., Mentoring. Bila je ovo izvanredna prilika svim posjetiocima za druženje sa više od 30 govornika na konferenciji u Tuzli a kao jedan od najuspješnijih Bosanaca i Hercegovaca u svijetu inženjerstva, po prvi puta govornik na konferenciji u BiH, bio je Namik Hrle, glavni tehnološki direktor i predsjedavajući IBM Data and AI tehničkog tima, IBM Academy of Technology. Na konferenciji su govorili još i drugi stručni govornici: prof.dr. Almir Badnjević, izvršni direktor i CEO „Verlab“ Društva za medicinski i biološki inženjering u BiH; prof.dr. Ahmed Kovačević, professor Howden Chair in Engineering Design and Compressor Technology, Department of Mechanical Engineering and Aeronautics, Velika Britanija, te mnogi drugi fenomenalni govornici. Sadržajem i izborom tema, zanimljivim predavanjima i prezentacijama te interakcijom sudionika i predstavnika realnog sektora ovaj stručni i naučni događaj je potvrdio aktuelnost i povezanost proizvodnje, industrije i razvoja gradova i inženjerstva kao najvažnije privredne grane u Bosni i Hercegovini. „BH Sedmice Inženjerstva 2019“ su organizovane u partnerstvu sa Vladom Tuzlanskog kantona i Gradom Tuzla uz podršku Addiko Banke, Fanuc-a i drugih partnera i sponzora.

Rekord i pored lošeg početka godine...

Aerodrom Tuzla će ipak zabilježiti novi rekord

Na godišnjem nivou imati veći broj putnika u odnosu na rekordnu 2018. godinu



Bez obzira što se analiza uradila prije isteka godine, na početku posljednjeg mjeseca, rezultati ukazuju na činjenicu da će Aerodrom Tuzla na godišnjem nivou imati veći broj putnika u odnosu na rekordnu 2018. godinu kada je zabilježeno 584.610 putnika. Broj će premašiti 590.000 putnika, povećanje neće biti veliko kao prethodnih godina ali će statistika biti u plusu što je za naš Aerodrom u ovoj godini veliki uspjeh s obzirom da je Wizz Air smanjio broj letova u odnosu 2018. godinu. Godina nije dobro počela. Manji broj letova u prva tri mjeseca rezultirao je značajnim smanjenjem broja putnika za 14%. Od aprila, kada je krenuo ljetni red letenja, u istom kapacitetu kao i prethodne 2018. godine, ukupan broj putnika počeo je da raste da bi u oktobru premašio za 0,3 % broj putnika u istom periodu 2018. godine. Novembar je bio iznimno dobar. Zabilježena su 35.484 putnika što je za 15,6% više u

odnosu na novembar 2018. godine. Manji broj letova a veći broj putnika jasno pokazuju da je porasla popunjenost aviona. U godini u kojoj je naš Aerodrom dobio ozbiljnog konkurenta u banjalučkom aerodromu, to je posebno značajan podatak koji nagovještava da će Wizz Air i narednih godina letjeti sa našeg Aerodroma.

D.K.



Fabrika cementa Lukavac u 2019. godini...

Društveno odgovorni projekti obilježili 2019. godinu

Nihad Begić: „Zadovoljni smo postignutim. Uspjeli osmisliti korisne i konkretne akcije. Trudimo se mladim generacijama omogućiti da se povežu sa prirodom“



Fabrika cementa Lukavac je tokom 2019. realizirala više društveno odgovornih projekata. Kao kompanija koja iz godine u godinu bilježi pozitivne poslovne rezultate, ove godine posvetila je posebnu pažnju projektima koji su bili namijenjeni građanima, prvenstveno mladima, s namjerom da se zajednički stvaraju nove vrijednosti za bolju i zdraviju budućnost.

„Sumirajući rezultate našeg poslovanja u 2019. godini, zadovoljni smo postignutim i mislim da smo uspješni osmisliti korisne i konkretne akcije, te smo ponosni na činjenicu da smo sproveli više društveno odgovornih projekata koji su bili i bit će imperativ našeg rada. Trudimo se mladim generacijama omogućiti da se povežu sa prirodom i da je znaju voljeti i čuvati. Naš dugoročni projekat »U prijateljstvu s prirodom« se pokazao vrlo učinkovitim. Više hiljada učenika i učenica širom BiH su učestvovali u njemu, a njihove pozitivne reakcije su za nas najbolji pokazatelj učinjenog i ujedno smjernica za naše dalje djelovanje“ - kazao je Nihad Begić, direktor prodaje i marketinga Fabrike cementa Lukavac.



Svako septembra se organizira Dan otvorenih vrata na zelenim površinama Lukavac Cementa, gdje se okupljeni građani porodično druže i sudjeluju u pratećim ekološkim i sportskim programima, te kreativnim radionicama.

Uz pomoć djece iz OŠ »Lukavac Grad« na Dan planete Zemlje Lukavac je postao bogatiji zelenilom, zasaden je 500 novih

stabala. A u junu 2019. Lukavac Cement je kao dijamantni sponzor podržao dječiju manifestaciju KIDS FEST 2019 i priredio mladim naraštajima zabavan i edukativan dan. Od kraja 2018. pa sve do danas Lukavac Cement je izgradio na desetine ploha za dječiju igru »Školica« i obradovao brojne mališane obdaništa i osnovnih škola širom BiH.

Grad Lukavac u septembru 2019. dobio je novi moderno uređeni plato ispred Doma kulture zahvaljujući ulaganju Lukavac Cementa u vrijednosti od preko 120.000 KM. Kapije Fabrike svakodnevno su otvorene za sve one koji žele da je posjete i uvjere se kako funkcionira cementara koja koristi alternativna goriva i sprovodi evropske principe energetske efikasnosti.



Fabrika cementa Lukavac je čvrstog opredjeljenja da daje poticaje projektima koji mogu osigurati kvalitetniji život, zdravu sredinu i ljepše okruženje. S ovom praksom se nastavlja i u 2020. godini, s namjerom da se dodatno intenzivira saradnja sa građanima, vladinim i nevladinim organizacijama, ekološkim udruženjima, školama, obdaništima i svima onima koji imaju isti cilj: očuvanje prirode i njenih resursa.

D.K.



Prezentacija sajma „List“ u P/GKFBiH...

Sajam “List” - prilika za promociju i poslovno povezivanje

Lukavački sajam turizma LIST predstavljen u Sarajevu



Organizatori jedne od najznačajnijih turističkih manifestacija u Bosni i Hercegovini, Međunarodnog sajma turizma i ekologije - LIST Lukavac, čije će 18. izdanje biti održano naredne godine u maju, očekuju da će taj sajam premašiti prethodni po broju izlagača, zemalja učesnica, pratećih manifestacija i posjetilaca. U Privrednoj komori Federacije BiH u Sarajevu je predstavljen Sajam čiji je fokus i dalje, uz mnoštvo sadržaja, na poslovnim susretima i povezivanju izlagača i drugih učesnika, prezentaciji njihovih ponuda, proizvoda i usluga. Predsjednik Organizacionog odbora Aziz Čačković je kazao da je Lukavački sajam mjesto i prilika da se prezentuju turistički potencijali, kako Tuzlanskog kantona, tako i BiH i šireg regiona.

“Trodnevne aktivnosti sajma su vrlo dinamične i raznovrsne. Pored klasičnog sajamskog dijela ponude i potražnje u oblasti turizma i ekologije, posvetili smo se i stručnom edukativnom dijelu. Već 17 godina u okviru sajma se održava tradicionalno takmičenje turističko ugostiteljskih škola koje svake godine okupi po desetak škola iz regiona, a znamo da je ugostiteljstvo temelj dobrog i uspješnog turizma. Pored toga različitim stručnim panelima i predavanjima nastojimo prenijeti pozitivne primjere u razvoju turizma, a kao jedan od glavnih sadržaja sajma je festival hrane i pića kao odraz tradicije našeg naroda i kvalitetne kuhinje. Tu je i zabavni karakter sajma, otvoreni koncerti popularnih zvijezda itd.”, izjavio je Čačković



(Aziz Čačković, predsjednik OO sajma List)

Privredna komora FBiH je, prema riječima potpredsjednika Marka Šantića, u jednom velikom projektu promocije bh

proizvoda, ponude i usluge u čitavoj BiH, prepoznala i ovaj 18. Lukavački sajam turizma i ekologije.

“Danas je trend u svijetu putovanje, više od milijardu i tri stotine miliona ljudi danas u svijetu putuje. Turizam je jedina grana koja od 1950. godine u kontinuitetu raste između 2,5 do 4,5 odsto. BiH je jedna mikro destinacija koja ima velike perspektive za tu privrednu granu i naša komora je to prepoznala, te smo ovaj sajam stavili u naš kalendar sajmova, podupiremo ga ne samo finansijski, nego i u stručnom dijelu”, kazao je Šantić.

Podsjetio je da su prošle godine utemeljili nagradu “Zvijezda turizma BiH” sa čime nastavljaju i ove godine, tako da i u tom pravcu ovom sajmu i turizmu u BiH daju jednu novu dimenziju.

“Komora FBiH radi zajedno sa komorama Srbije i Crne Gore na jednom zajedničkom turističkom proizvodu ove regije za kinesko tržište, prekoatlantske zemlje i drugo tako da se ovaj sajam dobro uklapa u našu mapu”, kazao je Šantić.



(Marko Šantić, potpredsjednik PIGK FBiH)

U Vladi Tuzlanskog kantona, kako je kazao ministar trgovine, turizma i saobraćaja TK Edin Buševac, prepoznali su značaj tog sajma i dugi niz godina učestvuju u njegovoj realizaciji.


“Smatramo da je turizam jedna od najznačajnijih razvojnih grana u TK i BiH. Nastojat ćemo kroz neke infrastrukturne projekte doprinijeti njegovom razvoju sa čime ide i razvoj ugostiteljstva i druge djelatnosti”, kazao je Buševac dodajući da je u TK nastavljen trend povećanja broja turista i noćenja,



kako domaćih tako i stranih.

Načelnik Općine Lukavac Edin Delić je kazao da je Lukavac sredina sa možda najvećim problemima u državi, ali sa najvećim razvojnim šansama.

“Sajam turizma i ekologije je na neki način manifestacija putem koje mi nastojimo riješiti i ono što nas najviše mori, a to su u prvom redu nezdrava okolina i zagađenje koja su i dalje prisutna u Lukavcu, a sa druge strane delegiramo Lukavac kao sredinu u kojoj se itekako mogu ostvariti pomoci u oblasti turizma. Mi smo se postavili zadatak koji realiziramo, da u periodu od četiri godine koliko traje ovaj mandat, otvorimo u novim fabrikama koje će biti okolinski prihvatljive, veći broj radnih mjesta nego što to imamo danas u tri fabrike koje u Lukavcu u najvećoj mjeri zagađuju”, kazao je Delić.



(Edin Delić, načelnik Općine Lukavac)

Dodao je da Lukavac ima povoljan geografski položaj i razvijene turističke kapacitete, te da je velik broj onih koji ga posjećuju, posebno onih koji se okupljaju poslovno ili na različitim kongresnim aktivnostima.

“Nije malo sredstava koliko mi izdvojimo da se ova manifestacija održi i milim da se ta sredstva višestruko vraćaju u direktnim i indirektnim koristima lokalnoj zajednici. Naše je opredjeljenje da sajam za svoje ‘punoljetstvo’ pomjeri granice u svakom segmentu, posjećenosti, broja izlagača i sadržaja”, dodao je Delić.



Saradnja VTK i entitetskih komora...

Na proljeće iduće godine prvi Dani BH turizma

Dvodnevna manifestacija koja bi se sastojala od konferencija, panel diskusija, razmjene znanja i iskustava turističkih djelatnika kako iz Bosne i Hercegovine, tako i iz okruženja



(Mirko Bošković, tajnik Asocijacije za turizam pri Vanjskotrgovinskoj komori BiH)

Prvi Dani BH turizma u Bosni i Hercegovini trebali bi biti održani na proljeće iduće godine. Sekretar Asocijacije za turizam pri

Vanjskotrgovinskoj komori BiH Mirko Bošković potvrdio je Feni da je na nedavnom sastanku Odbora Grupacije za turizam pri Vanjskotrgovinskoj komori BiH dogovoreno da se u suradnji sa entitetskim komorama, krene u organizaciju prvih dana BH turizma, dvodnevne manifestacije koja bi se sastojala od konferencija, panel diskusija, te razmjene znanja i iskustava turističkih djelatnika kako iz Bosne i Hercegovine, tako i iz okruženja. – Planirano je da prvi Dani BH turizma budu održani na proljeće 2020. godine, te da se tom prilikom dodjele i nagrade za najuspješnije firme i pojedince u turističkom sektoru BiH – dodao je Bošković. Na sastanku, održanom na Kupresu, turistički djelatnici su ponovno ukazali na brojne probleme sa kojima se susreću, a kao najznačajniji su naveli nepostojanje strategije za razvoj turizma u BiH. Također su istaknuli neusklađenost entitetskih zakona i propisa koji definiraju turističku branšu, kompliciranu procedura dobivanja BH viza za većinu država s kojima je na snazi vizni režim, sivu ekonomiju, te tretiranje, odnosno netretiranje turizma kao izvozne grane gospodarstva.

D.K.



Prezentacija projekta...

Uskoro nova dionica magistralne ceste Šićki Brod – Đurđevik

Za projekat na inicijativu Vlade i Skupštine Tuzlanskog kantona, od Vlade Federacije BiH je već osigurano 40 miliona KM



U Plavoj Sali BKC-a je upriličena prezentacija projekta izgradnje magistralne ceste M-18 Šićki Brod - Sarajevo, dionica Šićki Brod – Đurđevik. Domaćin prezentacije bila je Vlada Tuzlanskog kantona, a prema riječima premijera Kantona Denijala Tulumovića, „za navedeni projekat na inicijativu Vlade i Skupštine Tuzlanskog kantona, od Vlade Federacije BiH je već osigurano 40 miliona KM, dok se ostatak potrebnih sredstava može osigurati i iz kreditnih sredstava. Tim kreditima ne bi bio zadužen Tuzlanski kanton, nego bi se krediti vraćali iz sredstva koji se već prikupljaju po osnovu akciza na gorivo. Sve navedeno su konkretni pokazatelji da se radi o ozbiljnom projektu čiji je glavni cilj saobraćajna debljaka Tuzlanskog kantona”. Ukupna sredstva potrebna za izgradnju dionice magistralne ceste M-18 na Šićki Brod – Đurđevik iznose oko 146 miliona KM.

„Ovo je prva od etapa ukupnog projekta rekonstrukcije puta Tuzla – Sarajevo. Ova dionica ići će savim novom trasom i to je kompletno nova cesta, a od Đurđevika do Kladnja planirano je da se radi rekonstrukcija i modernizacija postojeće ceste sa dodatnom trećom trakom. Dužina dionice Šićki Brod – Đurđevik je oko 17 km i ona je podijeljena na tri lota. Prezentacija je upravo prilika gdje su se okupili predstavnici svih relevantnih institucija i nivoa vlasti kako bi smo što prije rješavali sve probleme s kojima se budemo susretali prilikom realizacije ovog projekta”, kazao je ministar trgovine, turizma i saobraćaja TK Edin Buševac.

Uzimajući u obzir stanje postojeće dionice magistralne ceste M-18 Tuzla – Kladanj, njena rekonstrukcija i sanacija ne bi postigli potreban efekat, s obzirom na činjenicu da su elementi postojeće trase takvi da onemogućavaju značajno unapređenje i poboljšanje njenog stanja. Svjedoci smo da na pojedinim dionicama, gdje magistralna cesta prolazi kroz Živinice i Kladanj, i spoj sa petljom Šićki Brod, dolazi do značajnog smanjenja protoka saobraćaja, zbog prevelike gustine saobraćaja i to ne samo u vršnim satima. Zbog svega navedenog odlučeno je da se krene u izgradnju nove dionice Šićki Brod – Đurđevik. Osnovni cilj prezentacije bio je da svim zainteresiranim stranama pruži osnovne informacije o samom projektu, te da se istaknu aktivnosti koje je potrebno da sprovedu nadležni organi/institucije u narednom periodu na svim nivoima, od lokalnog, kantonalnog do federalnog, sa ciljem ubrzanja realizacije ovog kapitalnog projekta za Tuzlanski kanton i Bosnu i Hercegovinu u cjelini.



„Kada je u pitanju ova dionica treba istaći da se radi o jednoj od najprometnijih dionica magistralnih puteva u Federaciji BiH, i to je jedan od razloga zašto smo izabrali da se upravo odavdje krene sa rekonstrukcijom. Provedbom svih radova cilj nam je da računsa brzina na magistralnoj cesti M-18 Tuzla-Sarajevo iznosi od 60 do 80 km/h zavisno od dionica. Time ćemo značajno smanjiti vrijeme putovanja između Tuzle i Sarajeva, te ostalih mjesta koja se povezuju ovom važnom cestovnom komunikacijom. Pored smanjenja vremena putovanja, povećat će se nivo usluge i stepen sigurnosti učesnika u saobraćaju”, kazali su predstavnici JP „Ceste Federacije Bosne i Hercegovine”, koji su zaduženi za realizaciju ovog projekta. Izgradnjom dionice magistralne ceste M-18 Šićki Brod – Kladanj obezbijedit će se znatno poboljšanje stanja postojeće mreže cesta kojim se Tuzlanski kanton povezuje sa ostalim dijelovima Bosne i Hercegovine, te bi se

omogućila brža i bolja veza Tuzlanskog kantona sa glavnim gradom Bosne i Hercegovine, te ostalim dijelovima BiH. Pored navedenog osigurale bi se velike mogućnosti za ubrzan razvoj Međunarodnog aerodroma Tuzla, te korištenje navedene zračne luke za potrebe šire populacije koja gravitira u i van projektnog područja magistralne ceste.

D.K.



Nastavak kvalitetne saradnje...

Memorandum Privredne komore FBiH, turskog IZFAS-a i sajma „Energa“

„Cilj je povezati naše specijalističke sajmove s nekim od najvećih u regiji“



Privredna komora Federacije Bosne i Hercegovine, kompanija Fair Services (IZFAS) iz Izmiria kao jedan od najvećih organizatora sajmovia u Turskoj, te predstavnici sajma Energa iz Bosne i Hercegovine potpisali su Memorandum o razumijevanju u Sarajevu u sjedištu federalne privredne komore. Potpisnici su predsjednik Privredne komore FBiH Mirsad Jašarspahić, u ime projekta Energa predsjednik uprave Tuzlanskog sajma Zlatko Alidžanović te u ime IZFAS-a zamjenik generalnog direktora Onur Fatih Gokcedag. Kako je navedeno, Memorandum između ostalog znači nastavak suradnje s turskim IZFAS-om. Predsjednik Privredne komore FBiH je u izjavi novinarima podsjetio da je ta institucija partner mnogim specijalističkim sajmovima u Bosni i Hercegovini, među njima sajmu Energa koji se svake godine održava u junu.

„Upravo aktivnostima sa sajmom Energa, s partnerskim sajmom MINEX koji organizira IZFAS u Izmiru, imali smo jednu vrstu ugovora o pružanju slobodnog prostora za promociju naše priče Energa u Izmiru i izmirske priče MINEX-a ovdje u Sarajevu. Baš po tom načinu ugovora, prije nekoliko sedmica smo boravili na ovogodišnjem sajmu MINEX te dogovorili nastavak saradnje u koju želimo da uključimo još specijalističkih sajmovia u Bosni i Hercegovini“, Jašarspahićev su riječi. Osim ugovora između Privredne komore i IZFAS-a, ovom prilikom su ugovor potpisali predstavnici organizatora sajmovia IZFAS i Energa isključivo zbog sajma MINEX koji je također turski sajam industrije, energije i rudarstva.

„Cilj je povezati naše specijalističke sajmove s nekim od najvećih u regiji te mislimo da je ovo dobar put, način kako se domaći sajmovi mogu održati i jačati putem ovakve vrste ugovora, ustupanjem prostora na bazi reciprociteta“ izjavio je predsjednik Privredne komore FBiH.

Predsjednik uprave Tuzlanskog sajma Zlatko Alidžanović je u ime projekta Energa kazao da današnje potpisivanje ugovora s turskim sajmom IZFAS nastavlja uspješnu suradnju sajamskog projekta Energa i specijaliziranog sajma MINEX, u organizaciji turskog IZFAS-a.

„Prije dvadasetak dana smo u posjeti Turskoj imali vrlo uspješan nastup bosanskih kolektiva, po prethodnom ugovoru, baziranom također na reciprocitetu, što daje sjajne prilike domaćim privrednim subjektima iz sektora energetike za kvalitetan nastup ne samo na turskom već i azijskom i svjetskom tržištu budući da je turski sajam MINEX jedan od najvećih sajmovia te vrste u svijetu“, rekao je Alidžanović. Nakon šest uspješnih godina razvijanja projekta Energa u Tuzli, taj projekat je praktično preseljen u Sarajevo te se sajam održava svakog juna u dvorani Skenderija, podsjetio je Alidžanović.

Potpisnik Memoranduma u ime turskog IZFAS-a Onur Fatih Gokcedag naglasio je značaj bosanskohercegovačkog tržišta za Tursku te dodao da su privrednici dviju zemalja postavili cilj, a to je – napraviti razmjenu od milijardu dolara. U tom kontekstu su stavljeni na raspolaganje svi resursi, od komorskih sistema privatnih kompanija ponaosob.

„Nadamo se da će naše dvije kompanije, pod patronatom Privredne komore Federacije BiH, odraditi dobar posao“, poručio je podsjećajući da je potpisivanju ugovora prethodio dvogodišnji period upoznavanja privreda dviju zemalja, zbog čega partneri nisu strani jedni drugima jer već dvije godine surađuju, kako u BiH tako i u Turskoj.



D.K.



Nova članica Komore...

Hotel "Soni lux" Tuzla

Obogaćena ponuda hotela za odmor i poslovno putovanje



Hotel Soni lux je smješten u centru grada Tuzle, u blizini niza atrakcija, uključujući slana jezera Pannonica, Trg Slobode i Solni trg. Gradski trg, Arheološki park – neolitsko sojeničko naselje i šetalište Slana banja su također u blizini ovog hotela sa četiri zvjezdice.




Hotel Soni lux pruža usluge smještaja sa doručkom, uz besplatan privatni parking sa video nadzorom. Hol hotela sa caffe barom je pogodan za odmor ili uživanje u dobrom razgovoru. Prostrane i udobne sobe hotela su modernog enterijera sa intimnom atmosferom i imaju pogled na jezera Pannonica i centar grada. Sve hotelske sobe su klimatizirane, posjeduju kupaonicu sa tušem, ogrtačima i sušilom za kosu. Sve smještajne jedinice posjeduju besplatan WIFI, smart LCD TV sa kablovskom televizijom, sto, garderobu, sef i mini bar.



Poslovni gosti mogu koristiti konferencijsku salu i salu za sastanke, predviđene za poslovne skupove. Osim toga, besplatan WIFI je dostupan u svim prostorijama hotela. Smješten u centru Tuzle, hotel Soni lux će ispuniti sve potrebe gosta, bilo za odmor ili poslovno putovanje. Usluge koje hotel pruža uključuju i usluge rent-a-cara, prevoza do aerodroma ili bilo koje druge destinacije. Prijatno osoblje na recepciji je na raspolaganju 24 sata gostima.



Osoblje govori bosanski i engleski jezik, i može pomoći pri planiranju boravka gostiju. Na 210 metara od hotela se prostire kompleks slanih jezera Pannonica, koji posjeduje Arheološki park neolitsko-sojeničko naselje i Muzej geološka postavka "Pannonica", dječiji zabavni park, sportske terene, te mnoge druge ugostiteljske, kulturne i zabavne sadržaje. Pored slanih jezera Pannonica se nalazi šetalište Slana banja, idealno za duge šetnje, trčanje i vožnju biciklom. Pješačka zona Tuzle je udaljena 250 metara od hotela a najveći trg u Bosni i Hercegovini, Trg Slobode, se nalazi na udaljenosti od 600 metara.



D.K.



Partnerski odnos Vlade i privrede...

Podrška razvoju privrede TK

Sastanak premijera Tulumovića i članova Vlade Tuzlanskog kantona sa proširenim upravnim odborom Grupacije poslodavaca TK



Vlada Tuzlanskog kantona u jednom od svojih fokusa ima i saradnju i podršku razvoju privrede, a dokaz toga je i sastanak premijera Tulumovića i članova Vlade Tuzlanskog kantona sa proširenim upravnim odborom Grupacije poslodavaca TK. Ovom prilikom razgovaralo se o općem stanju na području našeg kantona sa posebnim osvrtom na stanje i perspektive privrede, a sastanak je bio i prilika da se čuju prijedlozi i preporuke za definisanje metoda saradnje između Vlade TK i Grupacije poslodavaca, a koje će doprinijeti boljim odnosom i razumijevanjem sa ciljem stvaranja povoljnijeg poslovnog ambijenta na području Tuzlanskog kantona.

„O reprezentativnosti ovog udruženja govori najbolje činjenica, da Udruženje okuplja 193 kompanije koje zapošljavaju oko 30.000 osoba“, rekao je predsjednik Upravnog odbora Udruženja Ramiz Karić.

Premijer Tulumović je ovom prilikom ukratko i prezentirao šta je to što je Vlada već pokrenula, a u cilju pomoći privredi našeg kantona.

„Već ove godine smo pokrenuli nove projekte, neke postojeće smo prema uputi samih privrednika modificirali, a sve kako bi smo poslodavcima i privrednicima što bolje pomogli. Također za narednu godinu smo u okvirima Budžeta TK predvidjeli i povećanje sredstava za podršku obrtnicima, malim i srednjim preduzećima, što je sigurno pokazatelj našeg iskrenog opredjeljenja da budemo partneri sa privrednicima i njihov servis za stvaranje što boljih uslova za poslovanje“, kazao je premijer Tulumović, te dodao da je i današnji sastanak otvaranje jednog novog oblika komunikacije i pokazatelj namjera Vlade Tuzlanskog kantona.

Posebna pažnja danas je bila usmjerena ka smanjivanju parafiskalnih nameta, koji znatno opterećuju poslovanje privrednih subjekata.



„Jedna od naših ideja je da se iz reda poslodavaca, od strane Ministarstva finansija i jedne osobe koju bi odredio npr. Premijer, formira jedno koordinaciono tijelo za parafiskalne namete, a čiji bi zadatak bio da snimi cjelokupne parafiskalne namete na nivou Kantona i da se predlože određena rješenja“, rekao je predsjednik Karić.

„Svakako da će ova vlada biti u funkciji razvoja privrede i privrednika. To nam je jedna od obaveza koje sam iznio u ekspozeu Vlade TK, a zato jer je to nam je osnov za ostanak mladih ljudi na našem prostoru. Kada su u pitanju parafiskalni nameti za određene stvari Vlada ne može djelovati, jer su ti nameti najveći na nivou općina i gradova, te Vlada ne može utjecati na njihovo niti donošenje niti ukidanje. Ipak ova tematika bit će važan segment u radu ove Vlade i nastojat ćemo dati maksimum iz naših mogućnosti da stvari popravimo“ rekao je premijer Tulumović, ističući da je i prisustvo skoro cijelog saziva Vlade na ovom sastanku pokazatelj ozbiljnosti sa kojom Vlada pristupa saradnji sa privrednicima i rješavanju problema u privredi. Na kraju sastanka je zaključeno da je ovaj susret dobra polazna osnova. Dogovoreno je da se periodično i redovno i u narednom vremenu održavaju sastanci sličnog karaktera, a kako bi se saslušali međusobni stavovi, a poslovni ambijent na kantonu učinio što povoljnijim.

D.K.



Iz Vlade Tuzlanskog kantona....

Dobra volja da se pomogne Rudnicima „Kreka”



Poslovanje, konsolidacija, ali i razvojni projekti Rudnika uglja „Kreka” bili su tema razgovora na sastanku premijera Tuzlanskog kantona Denijala Tulumovića i ministra privrede Asmira Hasića sa generalnim direktorom Rudnika Osmanom Blekovićem i izvršnim direktorima Dževadom Čosičićem i Eldarom Huseinovićem. Na jednoj od posljednjih sjednica Vlada je dala saglasnost na tekst protokola o načinu izmirenja obaveza po osnovu obračunatih, a neuplaćenih koncesionih naknada, te je ova tematika i bila jedna od tema razgovora. S tim u vezi članovi Uprave Rudnika su izrazili zadovoljstvo što je Vlada usvajanjem ovog teksta protokola pokazala dobru volju da pomogne Rudniku, a i z Vlade je istaknuto očekivanje da će Kreka nastaviti poštivanje Protokola, a što je jedan od uslova za potpisivanje novog ugovora o koncesiji za eksploataciju uglja. „Vlada je svjesna značaja svih rudnika, pa i Kreke, za Tuzlanski kanton, Federaciju BiH i državu BiH u cjelini i voljna je pomoći, ali

u okvirima zakonskih mogućnosti”, složili su se ovom prilikom premijer Tulumović i ministar Hasić. Također, na sastanku se razgovaralo i o realizaciji zajedničkog projekta Rudnika Kreka sa Sodom Sisecam, a u vezi rekultivacijom rudničkog zemljišta, kojim bi se riješio i problem taložnice Sisecam Sode. Predstavnici Kreke su premijera Tulumovića i ministra Hasića informisali da realizacija ovog projekta teče na zadovoljstvo obiju privrednih društava, te da njegova realizacija doprinosi učvršćivanju poslovnih odnosa Sode i Rudnika. Obzirom na potrebe stambenih i poslovnih zona u Tuzli, Živinicama i Lukavcu, učesnici sastanka su se usaglasili da je u narednom periodu neophodno utvrditi stvarne eksploatacione potrebe Rudnika. Prema riječima predstavnika Rudnika, trenutno važeće eksploatacione zone datiraju iz 1962. godine. „Obzirom da dugoročne strategije Rudnika nisu usmjerene prema urbanim zonama, prije svih Tuzle, te neperspektivne zone bi se trebale ispisati iz eksploatacionih polja, što bi bio prvi korak i stvaranje preduslova za izmjene prostornih planova i stvaranje preduslova za dalji privredni i društveni razvoj lokalnih zajednica”, rekao je direktor Bleković. Na kraju sastanka istaknuto je zadovoljstvo činjenicom da Rudnici uglja Kreka danas posluju prilično stabilno, ali da problem i dalje predstavljaju stara dugovanja, nastala prije više od 10 godina. U tom smislu potpisivanje protokola kojim se ta dugovanja reprogramiraju za naredni period stvaraju preduslove za konsolidaciju Rudnika.

Više od milion KM nepovratnih sredstava za podršku razvoju privrede



Ministar privrede Tuzlanskog kantona Asmir Hasić potpisao je ugovore o implementaciji nepovratnih novčanih sredstava sa korisnicima grant sredstava sa pozicije “Podrška razvoja Kantona za 2019. godinu” među kojima su bili predstavnici malih i srednjih preduzeća, obrtnici, predstavnici udruženja, fondacija i komora te budući poduzetnici.

Ove su godine za poboljšanje poslovnog okruženja Vlada i Ministarstvo privrede TK izdvojili višestruko veći iznos nego u prethodnom periodu a riječ je o milion i 10 hiljada KM, raspoređenih na 6 projekata. Prema riječima ministra Hasića, ovim je programom predviđeno da obrti dobiju maksimalno 5000 KM, mala i srednja preduzeća dobiju max. 40 000 KM dok je za nove poslovne poduhvate Ministarstvo je izdvojilo po projektu 10 hiljada KM. Predstavnici će nakon realizacije projekta običi privredna subjekte kako bi vidjeli da li su sredstva namjenski utrošena, naglašeno je ovom prilikom. Sredstva u ukupnom iznosu od 913.420 KM bit će raspoređena na 48 korisnika sa područja TK. Od toga će za 9 budućih poduzetnika za pokretanje poslovnih poduhvata biti izdvojeno oko 90.000 KM dok će tri

udruženja i fondacije dobiti 33,6 hiljada KM za sufinansiranje razvojnih projekata finansiranih iz EU ili drugih međunarodnih fondova. Obrtnička komora TK će za promociju obrtništva u obrazovnim institucijama dobiti 10 hiljada KM, 310 hiljada KM obezbijedeno je za projekte malih i srednjih preduzeća a 100 hiljada za 22 obrtnika koji su aplicirali na Javni poziv za grant sredstva. Sa jedinicama lokalne samouprave, odnosno 5 općina/gradova Tuzlanskog kantona, čiji su projekti unaprjeđenja i razvoja poslovnih zona također odabrani u okviru ovog javnog poziva, bit će naknadno organizovano potpisivanje ugovora.

D.K.



RMU Banovići...

Zabilježena najveća mjesečna proizvodnja uglja u poslijeratnom periodu

U mjesecu novembru znatno prebačeni mjesečni plan proizvodnje uglja i otkrivke, navode u svom saopćenju iz RMU ‘Banovići’



Rudari rudnika Banovići svoj ovogodišnji praznik dočekuju u dobrom raspoloženju, jer su u prethodnom mjesecu uspjeli „oboriti rekord” i zabilježiti najveću mjesečnu proizvodnju uglja u poslijeratnom periodu. U mjesecu novembru proizvedeno je 183.893 tona separisanog uglja, što je preko 25% više od planom predviđenih količina. Pomenuti rezultati još su značajniji uzme li se u obzir da su mjesečni planovi već unaprijed postavljeni veoma visoko. Postignuti rezultat u proizvodnji, kao što je i spomenuto, najbolji je poslijeratni mjesečni rezultat Rudnika. Proizvodnja uglja u novembru prošle

godine takođe je bila iznad plana, a ovogodišnja novembarska proizvodnja je za čak 20% veća od prošlogodišnje, što je još jedan znak kontinuiranog napretka. Izvanredne rezultate na proizvodnji uglja, pratila je i realizacija otkrivke pa je u mjesecu novembru proizvedeno 121% metara kubnih čvrste mase, 21% više u odnosu na plan. Uprkos složenom stanju i teškoj situaciji koja je posljednjih mjeseci posebno istaknuta kada je pitanju ovaj Rudnik, radnici su i u takvim uslovima sproveli planirane aktivnosti i svoju energiju usmjerili na ono što je najbitnije, a to je proizvodnja uglja. I pored ograničavajućih faktora koji su uticali na proizvodnju uglja tokom cijele godine, kraj godine donio je stabilizaciju a samim tim i dobre rezultate koji su jasni indikatori za još jednu uspješnu godinu i lidersku poziciju rudnika Banovići u ovoj oblasti. Dobri poslovni rezultati nisu slučajni, prethodila im je temeljna priprema, dobra organizacija kao i povoljni vremenski uslovi za ovo doba godine. Naradne sedmice počinje montaža drobilica na Površinskom kopu ‘Turija’, investicija vrijedna preko 10.5 miliona KM Izgradnja transportnog sistema za odvoz jalovine na površinskom kopu ‘Turija’ rudnika Banovići, u završnoj je fazi. Obzirom da je odrađen veliki dio posla i da su ispunjeni svi uslovi slijedeće sedmice najavljena je montaža drobilica, investicije vrijedne preko 10.5 miliona KM. Ugradnjom drobilica izgradnja transportnog sistema biće dobrim dijelom završena, a njegovim puštanjem u rad Rudniku će biti znatno olakšan rad na odvozu jalovine, a samim tim i na proizvodnji uglja.

„Yavuz“ - 15 godina rada...

„Yavuz će proširiti pogone u Brčkom“

Cilj je i osvajanje zemalja regiona



U 2020. godini, kompanija Yavuz obilježit će svoj jubilej - 15 godina aktivnog rada i djelovanja na tržištu Bosne i Hercegovine. Od svog osinjanja do danas, kompanija Yavuz Company doo otvorila je tri fabrike, te 16 poslovnih jedinica u BiH. Također, ova uspješna kompanija proizvela je prve i jedine bh. PVC profile, koji se proizvode u Brčkom. Ova kompanija 2019. poslovnu godinu završava sa više od 400 uposlenika, od kojih samo 130 radi u fabrici smještenoj u Brčkom. „**U današnje vrijeme kada je veliki broj konkurencije u našem poslovanju, teško je boriti se sa igračima koji su na tržištu BiH, mnogo više i duže zastupljeni od nas. Ali to nama nije prepreka da iz godine u godinu rastemo i razvijamo se, da klijentima nudimo perfaktan proizvod koji cijenom i kvalitetom zadovoljava najstrožije standarde Evropske unije. Naš cilj je da u 2020. godini idemo korak dalje, da pojačamo tržišni udio, razvoj novih i inovativnih proizvoda, da svoje djelovanje iz BiH proširimo i na zemlje regiona, te da se orjentišemo na izvoz naših proizvoda iz BiH diljem svijeta**“, izjavio je Mustafa Yavuz, vlasnik kompanije Yavuz Company doo. Kompaniji Yavuz u 2020. godini glavni cilj bit će širenje svojih proizvodnih pogona, te će sa postojećih 10.000 kvadratnih metara zatvorenih pogona, 6.000 m2 otvorenog prostora i ukupne površine od 44.000 m2, doći do proširenja pogona na dodatnih 5.000 m2. Riječ je o fabrici smještenoj u Brčkom, koja je ujedno jedna od najvećih fabrika u ovom djelu naše zemlje. „**Investicije u proizvodnje pogone i razvoj novih proizvoda, naš su najveći cilj. S tim u vezi ukoliko ulažemo u proizvodnju, logičan slijed su i upošljavanja nove radne snage. Obzirom na jako lošu ekonomsku situaciju u našoj zemlji, te odliv mladih ljudi, ali i stručnog kadra, kompanija Yavuz će tokom 2020. godine raditi na povećanju svog kadra te će se zasigurno uposliti 10-15% novih uposlenika, koji će raditi u našim fabrikama ili prodajnim jedinicama, kojih samo u BiH imamo 19**“, dodao je Mustafa Yavuz. Bitno za istaći je da ova kompanija od svog osinjanja 2005. godine, pa do danas svake godine povećava prodaju i izvoz za 30 posto. Kompanija Yavuz svoje proizvode, proizvedene u BiH izvozi u Srbiju, Hrvatsku, Crnu Goru, Rumuniju, Makedoniju, Njemačku, Tursku, Nigeriju, Alžir, Tajland i druge.

D.K.



Najava sajmskih manifestacija...

Beograd, 42. sjam Turizma 20.2.2020.

42. Međunarodni sajam turizma, 20 - 23.2.2020. godine, Beograd



42. Međunarodni sajam turizma održati će se od 20. do 23. februara 2020. godine na Beogradskom sajmu. Zajedno sa 42. Međunarodnim sajmom turizma održati će se i 15. Međunarodni sajam hotelsko ugostiteljske opreme HORECA – OPREMA i 10. Međunarodni sajam vina BeoWine. Zemlja partner biti će Egipat.

Organizator: Beogradski sajam, Bulevar Vojvode Misica 14
11000 Beograd, Srbija
Tel: +381 11 2655 342
+381 11 2655 886
+381 11 2655 307
+381 11 2655 206
turizam@sajam.rs
Prijava za izlagače i opširnije o sajmu na
<https://beogradskisajamturizma.rs/>

Beograd: 46. sajam građevinarstva "SEEBBE", 22 – 25.4.2020.



Najveći sajamski događaj u građevinskoj industriji u jugoistočnoj Evropi, Sjam građevinarstva u Beogradu, održaće se od 22. do 25. aprila 2020. godine na Beogradskom sajmu. Specijalizovana je to međunarodna manifestacija koja obuhvata najrazličitije segmente građevinske industrije – od istraživanja i projektovanja, preko izgradnje i održavanja objekata u visokogradnji, niskogradnji i hidrogradnji, do predstavljanja najsavremenijih materijala, građevinskih mašina, uređaja i alata. U potpunosti ga i različiti načini adaptacije, rekonstrukcije i restauracije, kao i promocija starih zanata koji su druga krajnost savremenim informacionim tehnologijama i modernom upravljanju projektima. Kao finalna djelatnost, dio Sajma građevinarstva je i opremanje enterijera. Učesnici manifestacije su svi eminentni domaći i strani građevinski

proizvođači, distributeri i trgovci opremom i materijalima. Oni za posjetioce Sajma svake godine pripreme posebne popuste i specijalne uslove plaćanja proizvoda i usluga. Sjam građevinarstva jedan je od najznačajnijih poslovnih sajmova u Srbiji i regionu, i događaj koji je za sve učesnike i posjetioce idealna prilika i ambijent za premijerna predstavljanja inovacija i tehničkotehnoloških rješenja. Prijavni materijal na www.sajamgradjevine.rs.

BEOGRADSKI SAJAM
Bulevar vojvode Mišića 14, 11000 Beograd, Srbija
Dejana Cahun koordinator projekta
Tel: +381 (0)11 2655-248, 2655-899, fax: 2655-219
e-mail: seebbe@sajam.rs

Beograd: 58. sajam nameštaja, novembra 2020.



Najveći i najvažniji događaji u Jugoistočnoj Evropi u sferi dizajna, proizvodnje i distribucije nameštaja -58. Međunarodni sajam nameštaja, opreme i unutrašnje dekoracije, uz 58. Međunarodni sajam mašina i alata iz oblasti drvne industrije - i ove jeseni biće mjesto susreta proizvođača nameštaja i distributera, dizajnera, inženjera, arhitekata i šire javnosti. Šestodnevni renomirani evropski događaj i ove jeseni okupiće poslovne ljude, kompanije posvećene inovacijama, vrhunskom dizajnu, kvalitetu i funkcionalnosti nameštaja. U hali 5 biće izložene mašine i alati, i premijerno predstavljene tehničko - tehnološke inovacije od izuzetne važnosti za drveno prerađivačku industriju. Internacionalni karakter Sajma potvrđuje okupljanjem velikog broja poslovnih ljudi, kupaca, arhitekata, dizajnera i distributera iz regiona i svih krajeva Evrope. Veliki broj prestižnih kompanija koje će izlagati ove

godine pokazuju da je Beogradski sajam sve atraktivniji i da se nalazi na mapi bitnih evropskih dešavanja. Tokom trajanja sajma posjetioci će imati priliku da pogledaju već poznatu izložbu mladih dizajnera i da u programu Design Talks prisustvuju razgovorima sa eminentnim učesnicima iz cele Evrope. Vrhunac manifestacije i ove godine predstavljaju dodjela nagrade Zlatni ključ koju će internacionalni žiri dodijeliti najuspješnijim izlagačima za 2020. godinu.

Dobro došli na 58. Sjam nameštaja!
PRESS Beogradskog sajma
Ivana Višković tel: 011 2655 101, 063 395 871
Tamara Vasiljević tel: 011 2655 828, 063 328 169
E mail: press@sajam.rs
Web: sajamnamestaja.rs



Kalendari značajnijih sajmova u regionu...

ZAGREB: SAJMOVI ZAGEBAČKOG VELESAJMA ZA 2020. GODINU



Obavještavamo privredne subjekte, firme članice Kantonalne privredne komore Tuzla da su objavljeni kalendari sajmских manifestacija koje će se održati u Zagrebu tokom 2020. godine. Više informacija, sa detaljima o organizaciji i modalitetima učešća, o pojedinim sajamским manifestacijama dostupno je na web stranici organizatora: <https://www.zv.hr/sajmovi-7/7>

BUDVA: SAJMOVI JADRANSKOG SAJMA ZA 2020. GODINU



Obavještavamo privredne subjekte, firme članice Kantonalne privredne komore Tuzla da su objavljeni kalendari sajmских manifestacija koje će se održati u Zagrebu tokom 2020. godine. Više informacija, sa detaljima o organizaciji i modalitetima učešća, o pojedinim sajamским manifestacijama dostupno je na web stranici organizatora: <http://www.adriafair.co.me/>

BEOGRAD: SAJMOVI BEOGRADSKOG SAJMA ZA 2020. GODINU



Obavještavamo privredne subjekte, firme članice Kantonalne privredne komore Tuzla da su objavljeni kalendari sajmских manifestacija koje će se održati u Beogradu tokom 2020. godine. Više informacija, sa detaljima o organizaciji i modalitetima učešća, o pojedinim sajamским manifestacijama dostupno je na web stranici organizatora: <http://sajam.rs/kalendar-2020/>.

NOVI SAD: SAJMOVI U NOVOM SADU ZA 2020. GODINU



NOVOSADSKI SAJAM

Obavještavamo privredne subjekte, firme članice Kantonalne privredne komore Tuzla da su objavljeni kalendari sajmских manifestacija koje će se održati u Novom Sadu tokom 2020. godine. Više informacija, sa detaljima o organizaciji i modalitetima učešća, o pojedinim sajamским manifestacijama dostupno je na web stranici organizatora: https://www.sajam.net/images/2020/kalendar_prolece_2020.pdf.



Nove članice Komore...

U 2019. godini 14 novih članica za 7 mjeseci



KANTONALNA PRIVREDNA KOMORA TUZLA

Kada je u pitanju članstvo u Kantonalnoj privrednoj komori Tuzla, zadovoljstvo je istaći kako je u 2019. godini nastavljen trend povećanja broja članica. Velikom broju privrednih subjekata koje su potpisale članstvo u Komoru, za druga četiri mjeseca ove godine, pridružilo se njih još devet. Riječ je o slijedećim firmama koje su se odmah po uklanjanju u Komoru, aktivno uključile u rad granskih udruženja te izjavile spremnost za sudjelovanje na sajamskim

manifestacijama u okviru zajedničke sajamske postavke pod nazivom "Privreda TK". Sajamske aktivnosti će i u narednom periodu za svoje članice organizovati Kantonalna privredna komora Tuzla a zahvaljujući izuzetno kvalitetnim međukomorskim odnosima u zemlji i široj regiji te podršci Vlade Tuzlanskog kantona. Firme, nove članice Komore su:

"Bosfor" doo Živinice, "Welt Apo doo Tuzla, Etno restoran "Bardak" Đurđevik, "Amasal" Tuzla, "Hifa" doo Tešanj, PGL "Protect" doo Lukavac, "Intral BiH" Tuzla, "Zeka Comerc" doo Gračanica, "Mliječna industrija 99" doo Gradačac, "Soni Lux" Doo Tuzla, podružnica br. 1, Motel "Soni Lux" Tuzla, "Probosing" Doo Tuzla, Predstavništvo strane HO "CISP" - Comitato internazionale per lo sviluppo dei popoli Tuzla, "Azos" Doo Tuzla, BH IVF Centar "Dr Balić" Tuzla.

Obračunski period 25.4.2019. -30.11.2019. godine



U 2019. godini je nastavljeno izdavanje ATA karneta u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla. Podizanje dokumenata vrši se na mjestu gdje je zahtjev i podnesen. "Kada su u pitanju izdati ATA karneti i dodatni listovi u ovoj godini, dakle od 25.4.2019. do 30.11.2019., pristiglo je ukupno 264 zahtjeva. Od toga su bila 147 zahtjeva za izdavanje ATA karneta i 117 zahtjeva za izdavanje dodatnih listova za ATA karnet. Od 147 zahtjeva za izdavanje ATA karneta, 71 zahtjeva su podnijela fizička lica iz sljedećih opština: Kalesija, Zavidovići, Tuzla, Lukavac, Doboj Jug, Bijeljina, Živinice, Šekovići, Srebrenik, Tešanj, Milići, Ugljevik, Banovići, Jelah, Gračanica, Gradačac, Zvornik i Sapna, Bratunac, Poljice a 76 zahtjeva su podnijele firme iz Banovića, Miričine, Orašja, Bijeljine, Gračanice, Gradačca, Lukavca, Živinica, Srebrenika, Bratunca, Tuzle, Usore, Kladnja, Sapne, Milića, Čelića, Tešnja i Lukavice. Ukupno 96 fizička lica su podnijeli zahtjev za izdavanje dodatnih listova, a 21 zahtjev stigao je iz privrednih društava", izjavila je Amerlina Avdić stručni saradnik za finansijske i opće poslove - Uredu za pružanje informacija o ATA sistemu i izdavanje ATA karneta Vanjskotrgovinske komore u Tuzli. Sve dodatne informacije, kao i potrebne

upute o ATA sistemu i obrasce, zainteresirani mogu pronaći na web stranici Vanjskotrgovinske komore BiH www.komorabih.ba ili direktno – na osnovu dole navedenih kontakt informacija kao i u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla - Trg slobode bb – 75000 Tuzla - Tel/fax. +387/35/396-556 i Fax:+387/35/369-552, email: atatz@komorabih.ba - kontakt osoba: Amerlina Avdić.

D.K.



Led display na zgradi Komore...


NOVA USLUGA ČLANICAMA I FIRMAMA U TK



Poštovani, Led digitalno oglašavanje, u poređenju s tradicionalnim medijima oglašavanja, poput billboarda, čijeg se sadržaja jedva sjeti manji od 40 posto gledatelja, u zadnje vrijeme ima velike prednosti. Osim mogućnosti višestrukog reklamiranja jednog oglašivača na istom mediju, dokazano je da su pokretne reklamne poruke daleko više privlačnije nego statične reklame. Obavještavamo vas da je Kantonalna privredna komora Tuzla u prilici ponuditi vam oglašavanje na našem led displayu po povoljnim uslovima.




POSTANITE PARTNER KANTONALNE PRIVREDNE KOMORE
TUZLA!!!
OGLASITE SE NA NAŠEM LED DISPLAY PROSTORU!!!
ISKORISTITI IZUZETNO POVOLJNE GODIŠNJE I
ŠESTOMJESEČNE PONUDE!!!
POSEBNE POGODNOSTI ZA FIRME ČLANICE KOMORE!!!
Kantonalna privredna komora Tuzla
Kontakt osoba: Dino Kalesić
mob: 061/164-311
tel: 035/369-562
mail: dino@kpktz.ba
POSJETITE NAS! DOĐITE DA SE DOGOVORIMO!!!





THE CHAMBER OF ECONOMY OF TUZLA CANTON



TUZLA CANTON

Your Business Partner

